

古典文學 第二名 陳芃杉(原名陳霽洵)

個人簡介：高雄師範大學經學研究所碩士班三年級

1.南風文學獎 35 屆 古典詩第二名、古典詞第三名。

2.南風文學獎 36 屆 古典詞第一名。

---

## 古典文學組

### 五福路景三首

#### 其一 賣花老嫗

絡繹車塵吞佝僂，徘徊癯影步傾斜。  
臨窗怯問一株否，暝色莫沾含笑花。

#### 其二 新舊堀江

華燈擎晝領東風。送迓川流醉眼中。  
誰解堀江真面貌，鹽埕老去倚殘紅。

#### 其三 愛河橋上

向晚風搖倒影樓。煌煌臥此一長虯。  
虹燈糝若幽河眼，冠蓋如雲任爾浮。

### 崢嶸

愧向庭闈漸老聲。何時坐望我崢嶸。  
升沉慣識糊塗事，俯仰已疎直致情。  
天際迴雲堆壘塊，案前累牘伴浮生。  
書中樓粟不求得，落拓相看惟短檠。

### 未第，用杜甫〈江漢〉韻

墨翻身翻落，冥茫一小儒。

星芒點點遠，冰月怏怏孤。  
九尺寒雲疊，何時病骨蘇。  
欲高今折翼，夢裡哭翔途。

### 墨翮，用蘇軾〈雪後書北臺壁其二〉韻

文情久罷若寒鴉。戢羽深知遠五車。  
淹爾俗塵雙翼黑，錦然迷夢一林花。  
冰盤互古照顏色，墨翮欲今還上家。  
此去聯翩雲拂目，天衢落拓路多叉。

唐李亢《獨異志》：「後漢馬融勤學，夢見一林，花如繡錦，夢中摘此花食之。及寤，見天下文詞，無所不知。」

### 記甲午年高雄氣爆

須臾造化捉何人。翻覆洪爐掠葉身。  
颯火噴街摧百戶，瘡痕載道負千鈞。  
雖云黎庶為芻狗，曷遣地龍崩石鱗。  
速禍不需雲雨手，朝堂屢策入迷津。

### 醉落魄 夢後一作

與人何說。夢中翔翮思徂月。俄然十里煙茫闊。無處淹留，浮盪隨波迭。  
高寒幾仞雲堆疊。一朝身落西風冽。醒來襟冷燈明滅。孤惘難平，翻得潮生沒。

### 臨江仙 舊鐵橋公園日出

墨海蒼茫東隅裂，羲輪擘水浮濱。紫波翻沸似烹雲。江寬今覺察，遙浪皺彤鱗。

天糝流金酬楮墨，惟嘆筆力枯貧。千尋澎湃色無倫。翠園相鬱鬱，不息與朝暉。

### 黃鶯兒 澄清湖九曲橋至富國島同遊

步凌九曲千坪綠。煖律宣威，岸柳垂頭，毵毵相偕，釀湖沉鬱。波翠駘蕩晴光，  
激竹猗猗舞。芰荷焉睡清團？粉簇風鈴，春聚芳樹。

同駐。富國島軒亭，畹晚涼風與。拂來輕夢，倦客無依，微茫四望南浦。漫入幾晌華胥？  
絡繹投壺語。水色轉黛人歸，共沐斜暉去。